

Furlan, la paritetiche e promet gnovis normis di atuazion

Sierà la cuistion de aplicazion de leç regjonâl di tutele, valorizazion e promoziun de lenghe furlane - 29/2007 - dentri de fin dal an. E chest ae lûs de sentence dal 2009 de Cort Costituzionâl. Al è ce che al à dât par sigûr l'on. Giovanni Collino come president de Comission paritetiche Stât-Regjon pontant soreudt la atenzion ae part che la leç e dediche in materie di estension des funzions regjonâls sul insegnament de lenghe furlane tes scuelis. E par scomençâ la propueste elaborade dal Comitât pe autonomie e il Rilanz dal Friûl. La ocasion par fâ il pont su la situazion al è stât l'incuintri, volût propit dal on. Collino, tra i components de paritetiche (presints ancje il president de Provincie on. Pietro Fontanini e i professôrs Mario Bertolissi e Leopoldo Coen) cul sindic di Udin Furio Honsell, il retôr de Universitât dai Studis di Udin Cristiana Compagno, il rapresentant de Arcidiocesi di Udin mons. Giulio Gherbezza, il rapresentant de Societât Filologjiche Furlane Federico Vicario, l'espert di tutele des lenghis minoritariis avocat Guglielmo Cevolun, i components dal Comitât pe autonomie dal Friûl Gianfranco D'Aronco, l'on. Arnaldo Baracetti e Roberto Dominici, cun di plui il rapresentant dal Istitût "Pre Checo Placerean" William Cisilino.

La riunion e je tacade cu lis indicazions dadis de Cort Costituzionâl cu la sentence buride fûr l'an passât. Come che al è stât spiegât dilunc dal incuintri, la censure de Cort e rivuarde lis modalitâts che a permetin di esercitâ i principis ma e à il presi di une bande di ricognossi ae lenghe furlane il dirit ae tutele, di chê altre di fâ bogns ducj i principis de leç regjonâl 29/2007 come l'ûs dal furlan

tes publichis amministrazioni e la pussibilitât di insegnament tes scuelis. I rilêfs che la Consulte e à fat in merit ae lenghe te scuele come normis danosis de autonomie scolastiche a puedin jessi superâts, in acuardi cu la Autoritât scolastiche, in sede di Regolament di atuazion o almancul in sede di concertazion tra Regjon e Autoritât scolastiche. E se la strade par risolti il probleme de rifondazion de competence e passe pai Regolament di atuazion, chel altri probleme marcjât, chel organizatîf, nol pues che cjatâ la sô soluzion tal organisim che, tra i soi obietîfs, al à propit la difusion de lenghe e de culture furlane: l'Universitât. Il vulnus al sta di fat te formazion di une liste di docents di lenghe furlane: come riferît dal retôr Compagno si trate di une competence primarie de Universitât che no dovarès compuartâ coscj in plui. Il probleme, come che al è stât evidenziât di Collino, al sta ancje tal moment difil di konzunture economiche, moment che al podarès incidi in maniere negative ancje in chest ambit. Par chel che al rivuarde la propueste furnide dal Comitât al è stât unanim il consens dai components de Paritetiche. Par Fontanini, «i tims a son madûrs par dâ une voltade fuarte pe atuazion de leç sul furlan. Par chel che al rivuarde i aspjets economics, o pensi che cul federalisim fiscâl o podarìn decidi nò cemût doprâ i nestris bêçs. E o soi sigûr che, come furlans, o varin un grant consens viodude par esempi la fuarte adesion par vè la marilenghe tra lis materiis di studi dai propriis fis (30 mil fruts ogni an, ndr.). E chest - al à zontât - no cate lis campagnis di demonizazion su la presumude straçarie in materie di furlan. In cualitât di component de Comission paritetiche - al à dit -, il nestri compit cumò al è chel di puartâ a cjase il risultât».

Lunis ai 5 di Lui si è davuelte l'incuintri tra il president e i components de Paritetiche e i rapresentants dal mont furlan



Da sinistra Mario Bertolissi, Pietro Fontanini e Giovanni Collino